



Broj: **03/1-50-14-7-30-10/16**

Sarajevo, 26.10.2016.

PREDMET: Informacija o obavljenoj radnoj posjeti Komandi logistike OSBiH i Tehničkoj radionici za održavanje i uništavanje municije i minsko-eksplozivnih sredstava OSBiH - TROM, Doboju, 21.9.2016.

Sifet Podžić, predsjedavajući Zajedničke komisije za odbranu i sigurnost BiH, Boško Šiljegović, parlamentarni vojni povjerenik BiH, Ljiljana Milićević, sekretarka, i Željko Grubešić, stručni savjetnik, bili su u radnoj posjeti Komandi logistike Oružanih snaga BiH i Tehničke radionice za održavanje i uništavanje municije i minsko-eksplozivnih sredstava (TROM) sa sjedištem u Doboju.

Članovi Zajedničke komisije realizirali su ovu posjetu u skladu s Godišnjim planom rada za 2016. i s ciljem upoznavanja sa stepenom realizacije zaključaka s 21. i 27. sjednice koji se odnose na proces javnih nabavki u sektoru odbrane.

Brigadir Rusmir Mrković, komandant Komande logistike OSBiH, brigadni general Gojko Knežević, zamjenik komandanta, i general-major Husein Tursunović, komandant Komande podrške OSBiH, sa saradnicima bili su domaćini ove radne posjete čiji je cilj bio upoznavanje s trenutnim stanjem i aktivnostima ove komande i tehničke radionice.

Brigadir Mrković, generali Tursunović i Knežević upoznali su predstavnike PSBiH s misijom, glavnim funkcijama, težišnim operacijama, strukturom, razmještajem komande i jedinica, stanjem popunjenosti personala, realizacijom ugovora (2015. i 2016.) tokom snabdijevanja i održavanja, operacijama s MiMES-om, pomoći civilnim strukturama, težišnim zadacima, logističkim osiguranjem Komande logistike OSBiH te nizom problema s kojim se susreću u svom radu, što daje sliku o stanju u ovoj komandi (u prilogu: Informativni brifing komandanta Komande logistike OSBiH).

Komanda logistike OSBiH planira, organizira i pruža logističku podršku operacijama jedinica OSBiH na lokacijama razmještaja i poligonima za obuku s ciljem osiguranja potrebnih uslova za izvršavanje zadataka i ispunjenje misija jedinica OSBiH. Odgovorni oficiri u ovoj komandi opredijeljeni su za izvršavanje misije koju ima komanda.

Tokom posjete konstatirani su problemi s kojima se suočava ova komanda. Inače, Komanda logistike misiju izvršava veoma bitnim aktivnostima koje se odnose na snabdijevanje,

pružanje usluga, održavanje infrastrukture, osiguranje i održavanje skladišta naoružanja, transport ljudstva i opreme, medicinsku zaštitu, skladištenje municije i niz drugih aktivnosti.

Problemi u funkcioniranju Komande logistike ogledaju se u sljedećem:

- Ima teškoća po pitanju snabdijevanja artiklima ishrane, nedostaju jedinstvene terenske uniforme, nedostaju odjevni predmeti, nedostaje vojna zaštitna oprema i radna zaštitna oprema.
- Stanje zaliha motornih ulja i maziva ne zadovoljava potrebe, što onemogućava rad inženjerskih i deminerskih mašina.
- Kasni ugovaranje s dobavljačima energenata za grijanje (drvo, ugalj, gas i lož- ulje).
- Kapaciteti građevinske službe OSBiH nedovoljno su iskorišteni, tako da je tekuće održavanje objekata na svim lokacijama na veoma niskom nivou.
- Zalihe higijenskog materijala ne zadovoljavaju potrebe jedinica OSBiH.
- Kritično je stanje sa zalihama naoružanja, motornih vozila, borbenih vozila, informatičke i telekomunikacijske opreme jer je veći dio ovih sredstava zastario sa isteklim eksploatacijskim resursima, što dovodi u pitanje rentabilnost popravke i održavanja.
- Nedostaju individualni sanitetski kompleti za vojnike.
- U cjelini gledano, zalihe rezervnih dijelova po vrstama i količinama ne zadovoljavaju potrebe OSBiH, zbog čega su kapaciteti za održavanje i popravku u jedinicama OSBiH neiskorišteni.
- Sistemi održavanja motornih vozila svih vrsta i namjena su dotrajali, zastarjeli i zahtijevaju česte i nerentabilne popravke koji se uglavnom izvršavaju kod vanjskih servisera zbog nedostatka rezervnih dijelova u jedinicama logistike OSBiH.
- U zimskom periodu, zbog nedostatka adekvatnih pneumatika, dio motornih vozila za prijevoz ljudi nije operativan.
- Operacije za MiMES tokom 2016. godine u realizaciji inspekcije 100% ne idu planiranom dinamikom i trenutno su na nivou od oko 54%.
- Proces demilitarizacije MiMES-a u radionici TROM Doboj odvija se dobrom dinamikom. Na toj lokaciji i dalje su izraženi problemi s odvozom sekundarnih sirovina koje se dobivaju tim procesom i sam taj proces se odvija u raspravi o tome kako realizirati prodaju više od 1200 tona tzv. furde, što se pravda razlozima koji su poznati od 2008. godine, a odnose se na primjenu člana 9. Sporazuma o pravima i obavezama nad vojnom imovinom BiH.

Zaključak:

1. Očigledan je diskontinuitet u snabdijevanju jedinica OSBiH jer kasni proces zaključivanja ugovora s dobavljačima (puno je primjera koji potkrepljuju takvo stanje a i ugovori za hljeb se kasno zaključuju, što je najilustrativniji pokazatelj).
2. Nepoštivanje ugovornih obaveza od dobavljača direktno utiče na operativnost opreme i sredstava u OSBiH (primjer neredovne isporuke motornih ulja je očigledan i po vrstama i količini).

3. Dotrajalost teretnih, terenskih i putničkih motornih vozila i autobusa je dostigla kritičan nivo, što ugrožava izvršenja zadataka jedinica OSBiH kao i sigurnost ljudi i materijalnih sredstava koja se svakodnevno prevoze.
4. Očigledna je nerentabilnost održavanja vozila kod vanjskih servisera jer se ulažu velika novčana sredstva s malim ili gotovo nikakvim efektima.
5. Ključne misije OSBiH ugrožene su podacima o velikom procentu neispravnosti motornih vozila (autobusi, sanitetska motorna vozila, hladnjače, protivpožarne cisterne).
6. Za više od 80% motornih vozila vremenski i eksploatacijski resursi su istekli jer su stari više od 30 godina.
7. Nedopustivo dugo se čeka na donošenje pravilnika o dodatnim naknadama za lica koja su angažirana na poslovima u otežanim uslovima.

Sa zadovoljstvom konstatiramo dobre rezultate u procesu delaboracije višaka MiMES-a koji se odvija u TROM - Doboj. Rezultati koji se postižu su produkt predanosti osoblja koje radi u toj tehničkoj radionici, odgovornosti rukovodstva TROM-a kao i predanosti i odgovornosti pretpostavljenih komandi i struktura u njihovom sastavu.

Također, konstatiramo dobru saradnju nadležnih u OSBiH i MOBiH s predstavnicima UNDP-ja u BiH u realizaciji ovog projekta, što može biti dobar primjer u nastavku procesa uništavanja višaka MiMES-a. Iz te zajedničke aktivnosti treba izvući pouke i iskoristiti raspoložive resurse.

PREDSJEDAVAJUĆI KOMISIJE
Sifet Podžić

Prilog:

- Informativni brifing komandanta Komande logistike OSBiH, od 21.9.2016.

Dostavljeno:

- naslovu
- a/a